

Lès-aprèsses

L' pus tchôd moumint du carnèval,
final'mint, n' sont-ce nîⁿ lès-aprèsses ?
Saquants pinséyes èt saquants djèsses,
in.ne èrljion tout-in cristal...

Lundi : dalér quér l' nû balot
d'lé l' louwajeû qui toudis brète,
asprouvér l' colé, l' colèrète,
surtout n' nîⁿ roubliyî l' garlot !

Mardi : èl rève èrprind sès droûts
quand arîve èl kèsse dè champagne ;
dins l' câve, l' èstrangn prèche èl campagne
avant d' suwér pindant twâs djoûs.

Mèrcrédi : i plût dèss guèrjas...
quèstions tîj' néyes pa l' impacyince :
qué tans, pinsèz, f'ra-t-i dîmince ?...
sâra t-on cwafér lès capias ?...

Djeudi : c'èst l' mèsse du comitè,
ô local, jwayeûs rabind'lâdje
pou counwate l' orde dè ramassâdje
'yèt r'lapér 'ne pinte dè binéstè.

Vèr'di : donér l' eûre ô bosseû,
s' inscôfournér 'ne miyète a Baume (1),
sinti l' cûjène qu' èl tarte imbôme,
min.nér lès-oranjes ô porteû.

Sam'di : lès tout dèrnîⁿs splotons
avant d' plantér s' drapia su l' bèle :
vûdî l' ramon dè s' sinte capèle,
a lès chabots, piquî lès r'nons.

L' èscrène bouyone come in volcan
qui fristouye in roûl'mint d' bat'rîye ;
on bwat in bon vére in famîye
pou s' insclumi mwins fèrtèyant.

Èl nût', lidjére, va indjuglér

l' mirake d' in somèy foûrt brouchîle :
tout-in dormant, l' ome dèviⁿt Djîle
èt quand i s' rinvèye... Létâré !

(1): chaque vendredi précédant Laetare, les Ecoles de Baume organisent un carnaval d'enfants qui rencontre un succès croissant parmi les Louviérois et constitue une sorte de prologue au grand jour.

brètér : *travailler intensément* / s' inscôfourner : *s'échauffer* / (è)sploton :
échelon / bèle : *lune (on dit aussi : leune)* / (è)scrène : *soirée* / s' insclumi :
s'endormir / indjuglér : *engendrer* / brouchîle : *frugal*

NB : l'orthographe du mot « *Laetare* » a été wallonisée, ce qui explique :
Létâré...

Christian Quinet – La Louvière